

摘藻堂四庫全書薈要

集部

欽定四庫全書薈要

集部  
明詩綜卷十九

詳校官編修臣王天祿



欽定四庫全書薈要卷二萬四百九十二

集部

明詩綜卷十九

翰林院檢討朱彝尊編

姚廣孝 四首

廣孝長洲人幼名天僖既為僧名道衍字斯道  
洪武中以高僧應選侍燕邸永樂初論靖難功  
為僧錄左善世加太子少師復姓賜今名卒贈  
榮國公諡恭靖有逃虛子集

高季迪云衍公詩  
險易並陳濃淡迭

顯能兼采衆家不事拘挾俞汝成云少師詩  
縱淺近宜傳顧玄言云恭靖性空思玄心寂  
語新惠依法振不得專譽禪藻蔣仲舒云少  
師棲遁禪宗中嬰世網既參佐命卒叛初服互  
逃儒釋之間未獲進退之所其詩如初利天  
雖自快樂未就解脫魔障既深終當墮落  
靜志居詩話少師與十高僧同徵當時孝陵知  
人則哲何不移來復之誅誅之考前代桑門得  
預軍謀者若佛圖澄道安鳩摩羅什支曇猛竺  
朗皆非盛世之事少師獨早著才稱晚參帷幄  
文與北郭十友之林武居靖難諸臣之首吐吐  
怪事觀其入燕兩謁劉太保墓賦詩云良驥色  
同羣至人迹混俗知已苟不遇終世不怨讎偉  
哉藏春公箴賦樂巖谷一朝風雲會君臣自心  
腹大業既已成勛名照簡牘身退即長往川流  
去無復佳城百年後何人敢樵牧斯人不可作

再拜還一哭蓋早  
以歲春子自況矣

荅楊孟載

棲棲泊城南春色抱幽獨  
餘花猶綴紅衆樹已滋綠  
茲因塵內居始憶山中屋  
何時陪騎遊吟看舊題竹

送友人之松江

潮來沙磧平月落海門曙  
汀蒲轉風葉堤柳搖煙  
絮江頭春可憐天涯人獨去  
有歌送君行無酒留  
君住雪浪沒沙鷗雲帆出江樹  
回首讀書堆青山不

知處

題秋寺晚晴圖

猿將朔吹哀雲帶溪流駛相送獨歸僧蕭蕭夕陽寺

秋蝶

粉態凋殘抱恨長此心應是怯淒涼如何不管身憔悴  
猶戀黃花雨後香

解 縉 三首

縉字大紳吉水人洪武戊辰進士試中書庶

吉士尋除御史謫河州衛吏旋待詔翰林永  
樂初進侍讀學士直文淵閣預機務逾年  
進翰林學士出為廣西參議改交趾入奏  
事會太宗北征見東宮辭去為高煦所譖  
徵下獄命獄吏沃以燒酒瘞雪中死有春雨

齋集

楊東里云大紳詩豪宕豐贍頗似李杜  
黃廷臣云學士古體詩入太白集中

孰別其為近時之作蔡朔云先生詩豪縱  
放逸一自胸中流出譬之長江大河一瀉千

里覽者為之心驚目駭李賓之云學士才

名絕世詩無全槩傳者真偽相半頓令觀者

有楓落吳江之嘆 廖玄素云學士興會所  
到肆意成章水搏蛟 蚪陸剝犀象淵乎其不  
窮浩乎其有餘高皇智屈羣策親如善長貴  
如廣洋惟庸近侍如安如漁如觀如素雷霆  
所擊罔不震懾學士以一少年萬言批鱗靡  
所忌諱而聖度優容令其進學才難之歎猶  
可想見也 徐子元云大紳獨駕青鸞翔翔  
八極使謫仙遇之當懸榻以待 王元美云  
解大紳如河朔大仗鬚每戟張與之周旋酒  
食滄父 俞汝成云解學士才冠一時積學  
尤富發於詩文宜無與敵 乃多率意遣辭不  
事磨練若信筆游戲者然 蓋在國初風會習  
尚使然也 穆敬甫云解詩如塵起朱輪風  
生綠樞乃詩中貴游也 李時遠云學士天  
質甚美詞鋒甚銳但  
少溫厚和平之氣



詩話明初詩傳者多失真如楊廉夫題鍾山作  
此吾鄉朱山人純詩也解學士題虎顧衆彪圖  
則又庶夫之詩也乃說詩者謂太宗幾欲廢嫡  
見詩而止傳會之言殊堪發笑學士詩敏捷不  
大推馱其言曰寧為有瑕玉莫作無瑕石其立  
意固如是矣然就近體而論如細雨乍過西掖  
樹熏風送聽上林鶯青山拍拍風沙滿紅葉蕭  
蕭浦樹佈三下歲後桃花老二十四橋秋水通  
天連銅柱蠻烟黑地接珠厓海氣黃粵女艷妝  
爭舛髮徭人村鼓共鳴銅青山遠道遙相送畫  
舫中流獨自歸千家竹屋臨沙嘴萬斛江船下  
石頭未嘗不符作者亦何至叫鷺隳突若世所  
傳詠物諸詩衆惡皆歸皆由敏捷召之乃知騷  
裏以迅驟為主鷹隼以輕疾為妙張純之言大

論非篤

彭澤

青山圍一縣，隱隱見人家。  
亂石邊江出，孤帆帶日斜。  
翠添官舍柳，香泛驛樓花。  
不見陶彭澤，湓城起暮鴉。

寄黃玄齋

來時蕭峽駐輕舟，惆悵初年作遠遊。  
夢裡相思不相見，武功山下月輪秋。

龍州

波羅密樹滿城闌，銅鼓聲喧晝賽神。  
黃帽葛衣墟市客，

青裙錦帶冶游人

楊士奇 十七首

士奇名寓以字行泰和人建文時以辟召入翰林永樂初改編修入直文淵閣累官少師華蓋殿大學士贈太師諡文貞有沙羨石

臺東里諸集

楊弘濟云東里歌頌太平未嘗不致做戒之意至于觸物起興

亦莫不各極其趣

體製音響皆發乎性情非

求之工巧者比

李賓之云文貞學杜問得

魏晉遺意

徐子元云東里格調清純實開

西涯之派

王元美云楊東里如流水平橋

粗成小致  
胡元瑞云楊文貞文敏胡文穆  
金文靖皆大臣有篇什者頗以位遇掩之詩  
體實平正可觀  
蔣仲舒云少師韻語妥協  
聲度和平如潦倒書生雖酬酢雅馴無復生  
氣

詩話東里僂游按行諸體皆蘊藉可觀其自  
序云古之善詩者粹然一出於正用之鄉閭  
邦國皆有裨於世道夫詩志之所發也三代  
公卿大夫下至閨門女子皆有作以言其志  
而其言可傳余早未聞道既溺於俗好又往  
往不得已而應人之求即其志之所存者無  
幾也亦可謂  
能自訟矣

# 送尤文度歸吳中

我友整遐裝，誓將起旋歸。平明發城邑，率彼東路馳。爰  
與二三子，祖餞臨郊岐。中觴趣分袂，恨恨使我悲。嚶鳴  
求其友，竊慕伐木詩。平生携手好，何為中此離。行當阻  
川岫，安得睹光儀。情敦思苦深，久要諒不遺。各言崇令  
德，庶保黃髮期。

漢江夜泛

汎舟入玄夜，奄忽越江干。員景頽西林，列宿粲以鱗。凝  
霜飛水裔，回飈蕩微澗。孤鴻從北來，哀鳴出雲間。時遷

物屢變游子殊未還短褐不掩脛歲暮多苦寒悠悠念  
行邁慊慊懷所歡豈不固時命苦辛誠獨難感彼式微  
詩喟然興長歎

李舒章云楚楚  
自好不失選體

同蔡尚遠尤文度朱仲禮楊仲舉蔡用嚴游東山  
步出城東門逍遙望雲巘累月懷佳遊茲晨遂登踐梵  
宇繞層阿飛樓凌絕峴方塘涵湛碧喬林茂敷衍繁翳  
幽莫通丰茸紛不剪攀磴窮高躋緣逕屢回轉是時微  
雨收輕霞澹舒卷睇遙素橫川俯夷綠盈畎陟降體自

使顧睇心已緬況接曠士言復偶釋子辯析空理弗昧  
違喧抱逾展何因此間棲永令浮慮遣

永豐曾氏龍潭

開軒面澄潭潭水綠於染其下蟠蛟蚪四時興有滄嘉  
樹羅蔥舊煙霞互舒斂晴漪漾春牖涼颺含暑簟俗轍  
謝經過書卷恒不掩探微心有得行素道無歎消搖視  
天宇油雲馳冉冉庶跂沂上樂誰當歎與點

題劉逸人樂耕卷

理生雖異業居世皆有務治本既在茲食力余所慕九  
扈春始鳴興言向田墅初來正溝塍爰方藝禾黍雖有  
耘耨勞三時足甘雨歲功聿已成屢豐報田祖儲峙何  
必多取具充寒暑有酒可同歡時時會鄰父既醉去悠  
然登高睇平楚一為擊壤謠游心緬千古

雨中寄鄒仲熙

炎月苦淫雨抱疾坐幽居淖泥橫隘巷流潦溢深渠已  
絕還往迹遂將人事疎時聞黃鳥鳴交交屋東隅豈無



斗酒酌閒玩古人書興懷在君子夙昔同歡娛契誼託  
金蘭清德重璫璵跬步不可即而況千里餘仰瞻白日  
暉屏翳何由舒念維余未弭單居子何如

題費同知松樹障子

當代畫松誰最精王紱卓迪俱馳聲兩生以來鮮繼者  
鳳池周璿新得名此圖筆有千鈞力全幅剡藤開潑墨  
雙株奮起如雙蚪直氣森森勢千尺樛枝屈鐵蟠穹蒼  
勁節磊砢鱗甲張長風颯颯動滿座六月清晝高堂涼

吉安別駕好奇古對此宛然巖壑趣茯苓琥珀焉足期  
堅操終懷共遲暮別駕別駕臨安彥浙東山東宦游徧  
四明徂徠千歲植所歷山林屢嘗見大材之成由化工  
自古匠輪希得逢明堂清廟選梁柱何限空老深山中  
賦得滄浪送陳景祺守襄陽

漢水帶襄城滄浪舊有名分符來五馬如練照雙旌濟  
涉思為楫聽歌想濯纓須令郡人說堪比使君清

荅黃宗載

又是三年別新來百感增  
薰蕕安可問杓鑿苦難勝  
白髮落垂盡青山歸未能  
故人贈佳句擬報玉壺冰

夜發清江口

日落煙水寒解纜清江渚  
中夜北風來相送潭州去

過谷亭

明月轉檣竿露下孤篷濕  
欲繫谷亭舟沙頭風正急  
夾溝遇邑人

聞道故鄉來辭家今遠近  
恐有南京書停舟試相問

題鄂渚贈別

鸚鵡江中紅樹鳳皇城裏青山借問來游幾日秋水蘭  
舟獨還

三十六灣

湘陰縣南江水斜春來兩岸無人家深林日午鳥啼歌  
開遍滿山紅白花

宣德丙午謁二陵

二首

去年侍從謁長陵此日重來慟倍增春柳春花渾似昔

獻陵陵樹復層層

君恩追憶不勝哀  
老淚乾枯病骨摧  
陵下一來腸一斷  
餘生知復幾迴來

過城陵磯

城頭水落石層層  
石上魚樵半搭罾  
忽望高樓出城郭  
舟人指點說巴陵

楊 榮 三首

榮初名子榮字勉仁  
建安人建文庚辰進

士除翰林編修靖難後入直內閣更今名  
累官工部尚書謹身殿大學士加少師卒  
贈太師諡文敏有雲山小橐靜軒退思等  
集

詩話東楊詩頗溫麗上擬  
西楊不及下視南楊有餘

題馮敏山水圖

鳳池仙客天機精筆端點染真天成想當適意自盤礴  
呼吸造化含元英欣然寫此得佳趣雲水微茫帶煙樹

左孳右攫森相樛恍若蛟龍飛不去懸厓峭壁不可攀  
峒窵直入霄漢間幽亭卜築在深處塵氛不到清晝閒  
是誰蕭散事游賞短檝輕舟自來往晚風不動碧波平  
激灑寒光映蘭槳斯人偉矣真罕儔飄飄儼若神仙流  
披圖一覽發清興彷彿萬里江南秋

元夕賜觀燈

象緯臨天闕瑤臺集萬靈雲霞紛掩映星斗疊晶瑩  
地春應滿金門夜不扃千官陪宴樂拜舞在明庭

鑑湖一曲為史院判題

見說山陰道湖光一鏡秋遠含晴日動迴帶晚煙浮花  
發連堤樹帆飛隔浦舟橫塘空有夢未許賦歸休

楊溥一首

溥字弘濟石首人建文庚辰進士除翰林編修  
靖難後轉太子洗馬宣德初以太常卿兼學士  
直內閣歷官少保武英殿大學士諡文定有集

詩話三楊位業並稱  
南楊詩名獨不振



楊思敬東郭草亭燕集

芝蘭本同氣桃李自成蹊  
感彼歲易邁肯與心賞違  
迨迨禁城東桑麥連重畦  
聯轡縱遐覽我懷浩無涯  
惠風煦澄景微雨浥芳姿  
人生有至樂舉觴歌於斯

胡廣二首

廣字光大廬陵人建文庚辰賜進士第一更名靖除翰林修撰靖難後直內閣復名廣累官文淵閣大學士卒贈少師禮部尚書諡文穆有冕

菴扈從集

楊東里云胡公賦詩取適性情近體頗得盛唐之趣

詩話楊東里楊白花云楊白花逐風起含霜弄  
雪太輕盈蕩日搖春無定止樓中佳人雙翠顰  
坐見紛紛渡江水天長水濶花渺茫一曲悲歌  
思千里胡光大楊白花云楊白花渡江竟不還  
非汝故來急恐落泥塗間春光憔悴如花顏相  
思不見空長歎浮雲流水何漫漫安得隨風返  
高樹仍結柔條莫飛去世傳表景文賦此題蓋  
緣讓皇遜國而作然則兩公詩亦不無故主之  
思矣然邪否邪詆光大者謂金川門之變約周  
紀善同死既而人偵之尚在銀冢果爾則可鄙  
已甚觀集中過顏平原文信國余青陽祠輒有  
弔古之作其題宋思陵所書洛神賦云靜夜焚  
香閱舊書洛神下筆意何如可憐不寫平戎策  
千古中興恨有餘汴水園林迹已荒南來宮館

燕錢塘卧薪有志圖恢復好寫招魂酌岳王其  
辭悽惋不類牧豬奴東里尤與相契胡語楊曰  
吾兩人實兄弟後死則銘及胡沒後楊夜夢偕  
胡泛舟自快問至郡城下聯句胡云金螺瀟灑  
對芙蓉楊云鷺渚漁舟窈窕通遠樹白雲秋色  
淨胡云故人清興酒船同山河夢冷謳吟後楊  
覺而續之云生死交深感慨中猶想勝緣如夙  
昔並騎黃鶴過江東永嘉謝庭循為作圖相傳  
東里亦與紀善誓同死後語其子曰吾若偕亡  
誰與尊公作傳豈兩人品行相近故友誼諄諄  
若是一邪

### 滕縣隨獵

隨獵入深山山深多乳虎虎見人來却負嵎人一向之

觸而怒羣犬聞虎聲競趨至虎傍下口亂咋虎莫當犬  
視齧虎如齧羊昔聞泰山麓有虎相馳逐尼父駐遊車  
下問婦人哭嗚呼安得此犬在當時盡驅猛虎食其肉

重陪駕至太液池

玉砌臨無地飛甍上倚天微風斜舞燕高柳沸鳴蟬芳  
草茸茸細池荷箇箇員孰知丹禁裏別有好林泉

金幼孜一首

幼孜初名善以字行新淦人建文己卯舉人授

戶科給事中靖難後改翰林檢討歷右諭德掌  
翰林學士陞文淵閣大學士歷官太子少保禮  
部尚書兼武英殿大學士卒贈少保諡文靖有

北征集

詩話文靖扈駕北征大漠窮沙靡  
不身歷故其詩時露悲壯之音

元夕觀燈應制

閭闔重重夜不扃瓊樓十二敞銀屏東風一曲昇平樂  
此夜都人盡許聽

夏原吉 一首

原吉字維喆湘陰人以鄉薦游太學選授戶部  
主事建文初擢戶部右侍郎靖難後進尚書遣  
視江南水利歸掌行在吏禮兵部都察院事仁  
宗即位復戶部尚書加少保兼太子太傅宣德  
五年卒贈太師諡忠靖有集

詩話長陵靖難而後瑞應獨多黃河清甘露降  
嘉禾生醴泉出卿雲見野蠶成繭麒麟騶虞青  
鸞青獅白雉白燕白鹿白象元兕元犀史不一  
書甚矣天之難謔也當時詞臣爭獻賦頌夏公

長律會粹而詳書之其見閎麗讀之如覽西周  
王會之圖披北魏尚齊符瑞之志亦可云詩史  
矣特魚虞模並用殆  
猶遵洪武正韻乎

### 聖德瑞應詩

聖主膺乾運垂衣馭八區道隆堯舜比功茂禹湯俱蕩  
蕩三邊肅熙熙兆姓娛普天歌至治率土發靈儲爰有  
諸蕃國能忘萬里塗隨槎超瀚漫獻瑞効勤渠渺渺來  
中夏惓惓覲帝居麒麟呈玉陛獅子貢金鋪紫象靈山  
種驂留渥水駒駝雞同鷺鷥文豹擬騶虞福祿身紆錦

靈羊尾載車霜姿狻更異長角獸尤殊綵檻竒音鳥雕  
籠雪色烏元龜三尾曳山鳳五花敷日上龍墀麗風回  
貝闕迂禮官躬典設蕃使肅奔趨仙掌開丹宸祥煙散  
紫衢重瞳欣一顧百辟震三呼茲豈尋常致端由治化  
孚既將昭帝德尤足壯神都炎漢何能擬姬周莫並驅  
拜瞻嗟慶幸稱贊媿荒疎惟願皇風洽仍祈化日舒鴻  
圖千載固聖壽萬年餘

黃淮一首



淮字宗豫永嘉人洪武丁丑進士除中書舍人  
陞翰林編修歷侍讀左庶子進右春坊大學士  
輔東宮繫詔獄十年洪熙初入內閣兼武英殿  
大學士累官少保戶部尚書卒諡文簡有介菴  
省愆歸田等集

詩話長陵北征留文簡輔皇太孫漢庶人中以  
蜚語繫詔獄十年遂以省愆名集集中詩所云  
寶劍薤豐城爛斑土花碧又云十年頓足園扉  
間時向牆頭看柳色是也因是受知宣廟特深  
當共入廟賜遊西苑肩輿登萬歲山宴太液池  
親灑宸翰贈行有云朝旭光升紫殿清相對清

言良慰情留之累月不盡意歸心又欲東南征  
雁宕峰高馬不極中有謝公舊游蹟采芝斲苓  
可長年應在天南憶天北  
君臣相悅可謂千載一時

勵志

猗猗者蘭于彼空谷悠悠我思曷云其穀猗猗者蘭維  
芳維馨我有好爵君子攸寧蘭之榮矣繁霜瘁之靜言  
孔念中心悵而蘭之瘁矣益厚其根我之懷矣匪善奚  
敦蘭之瘁矣芳華載陽淑慎其身終焉允臧

李至剛 三首

至剛名銅以字行松江華亭人洪武中舉明經  
試禮部郎中出為河南布政司參議永樂初以  
薦擢右通政拜禮部尚書兼左春坊大學士

詩話尚書無詩名  
其僅存者頗娟秀

### 題王孟端送行圖

汀洲杜蘅歇南浦西風生美人鼓蘭楫路指江南行南  
行向何許東望吳松去吳松秋水多綠遍芙蓉渚渚外  
九龍山山邊三泖灣人家臨水住日暮采菱還采菱歌

易斷送子愁零亂愁來可奈何思滿江南岸江南不可  
思動子情依依皇都春色早遲子速來歸

朱澤民秀野軒

幽居遠城郭寂寞自成村野色還通市春潮直到門竹  
窻晴曬藥花塢晚開尊想象其中趣何由得具論

趙子固水仙

水精宮闕夜不閉仙子出遊凌素波為愛低頭弄明月  
不知零露濕衣多

趙

壯一首

班字雲翰祥符人洪武丁卯舉人授兵部主事  
遷員外陞浙江右參政命使交趾還擢刑部右  
侍郎改工部復改禮部尚書尋改兵部再改刑  
部有倉父集

詩話尚書識于忠肅于弱齡可謂具知人之鑒  
忠肅序其詩云尚書雍容廟堂之暇發為辭章  
長篇短什操楮立就有沈雄而典重者有舒徐  
而優柔者有平行而沖淡者有光采煥發而豪  
宕放逆者有清新流麗而愜慨者憂態不  
一豈區區拘泥聲律摹仿前人於萬一者之可

擬哉其稱許未免過  
情蓋知己之感深矣

城南書事

三年為客寄龍沙望斷南雲不見家惟有受降城外月

照人清淚落悲笳

陳卧子云頗有嘉州之風  
蔣仲舒云一字一淚

黃福二首

福字如錫昌邑人由鄉貢仕為主簿累官戶部  
尚書卒贈太保諡忠宣有後樂堂藁

過武昌

城頭黃鶴樓城外鸚鵡洲  
觚稜出漢表葭莢分江流  
樓棟白雲暮接天芳草秋  
我來吟不盡沽酒載行舟

長沙懷古

漢庭求士急洛下賈生賢  
損益乃長策紛更真少年  
楚江魂不返宣室席空前  
一櫂西風過令人倍惘然

陳璉九首

璉字廷器東莞人洪武中以明經薦為桂林教授遷國子助教永樂初知許州改滁州尋以揚

州知府攝州事擢四川按察使入為南京通政  
使掌國子監事終南禮部侍郎有琴軒集

詩話琴軒詩較孫仲衍不及  
視雪篷聽雨者君似勝之

游新安爛柯山王喬洞

峨峨爛柯山日夕生紫煙仙人啓洞府澗水導其前  
白石寒齒齒幽篁靜娟娟紺露泣瑤席慶雲集蕙楊冷風  
從東來可以散煩悵萬變紛在目汎覽何茫然王事有  
嚴戒胡能久周旋振衣下山去滿耳淒鳴蟬



蘇小小墓

蘇小家鏡塘橋李有遺墓方姿竟何在碑石宛如故光  
陰百歲短聲色幾人悟可憐墓前花涓涓泣秋露

曉發麻沙夾

昨暮維輕舸蕭條近沙渚篷窗倚蒹葭浙瀝鳴秋雨晨  
興喜光霽萬象爭快覩雙帆駕順風如鳥插新羽潮來  
海氣腥浪起雪花舞行望鐵甕城雲邊見樓櫓

羅稚川山水歌為孫伯貞賦

郭熙後有羅稚川妙畫往往人爭傳醉來乘興掃輕素  
下筆蕭颯生雲煙天台雁宕宛相似仙樓佛閣紛滿前  
春風瑤草發幽澗暮雨藤蘿垂古阡危橋半空度羸馬  
斷崖千尺飛寒泉扁舟一葉欲何往人家多住沙岸邊  
牛羊雞犬各成隊武陵何必求神仙我亦平生好清致  
出山自笑歸無緣還君此畫三歎息羅浮東望心悠然

哀光口有序

南漢馮餘宮東西招討使內侍監上柱國邵廷

瑁劉鋹愛將也宋太祖受禪廷瑁言於鋹曰漢承唐亂居此五十年幸中國有故干戈不及而漢蓋驕於無事然兵不識旗鼓而人主不知存亡夫天下亂久矣亂久而治自然之勢也今真人已出必將盡有海內其勢非一天下不已宜修兵為備不然率珍寶奉中國遣使以通好鋹懵然不以為慮及宋師伐南鋹所遣將戰死始思廷瑁言命廷瑁以舟師出洸口有諧之者鋹

遣使賜死士卒排軍門訴無反狀不能救為立  
祠洸口廷瑁東莞人邵村居者即其遺族

哀洸口天為愁海風吹鬢寒颼颼五羊城頭天狗墮南  
漢霸氣應全收天吳海鯨恣吞噬漠漠妖氛徧南裔皇  
風聞已暢中原嶺海瘡痍待前洸禹餘宮使輸忠言主  
聽不悟誠堪憐舟師甫自屯洸口此身已殞讒人手至  
今山下有遺祠日色慘澹行人悲

得家書聞舍弟琦來京喜而有賦

偶得鄉人至今秋道爾來家書千里發懷抱一時開準  
擬同聯句安排共舉杯從今思更切頻上鳳皇臺

曉過黃州

黃州竹樓雪未晞獵獵寒風吹客衣征帆此時向東去  
行李何日從南歸青山幾點煙際出白鳥一雙江上飛  
欲訪蘇公舊遊處倚篷回首思依依

七星巖

六丁何年開翠岑穹窿石室高千尋煙生丹竈火常在

花落碧桃春又深倚巖懷古有誰會埽壁題詩還自吟  
日華月華去已遠玉笛誰能傳妙音

宿龍泉寺

歸鶴翩翩帶夕曛上方鐘磬隔林聞不眠一夜聽春雨  
起視四山生白雲自是遠公偏好客獨憐支遁最能文  
閒身安得頻來此細草長坡數鹿羣

胡儼四首

儼字若思南昌人洪武末會試乙科授華

亭教諭永樂初擢翰林檢討同解縉等直

內閣尋遷國子監祭酒洪熙元年加太子

賓客致仕有頤菴集

熊伯幾云若思篤學好古辭氣英邁足以

追蹤作者

胡光大

云若思溫厚雅瞻而

有疎宕之氣

鄒孟熙

云賓客鋪張至治

富贍不窮

楊東里

云若思體物緣情端

厚微婉

李時遠

云賓客詩豐蔚為時所

重

詩話長陵詩難之後簡詞臣入贊機務者

七人躋年而解大紳胡若思出續入者王

行儉楊弘濟久而王亦出以是相業盛稱

三楊論世者謂解胡王三公才品學術在

三楊之右使其不出發於事業必更有可觀者然揆之以時度之以勢有所不能也  
賓客學文於鄉先生熊到伯幾伯幾學於  
虞集伯生故其文有源本詩亦近西江派

### 遠將歸

去年與郎別楊花飛白雪今年候郎歸楊柳綠依  
依聞郎買船下湘渚日日門前望行人過盡  
乳鴉啼徘徊日暮空延佇攬衣回洞房對鏡卸新  
妝那知清漏短但愛明月光月光照席涼於水帳  
裏燈花撒紅蕊好事從來不浪傳明日升堂拜姑



喜

村居秋興

草蟲階下鳴夜久猶未歇  
掩卷坐閱寥秋聲振林樾  
人生知幾何憂來不可輟  
風吹浮雲開送我半窗月  
逍遙步前庭孤螢自明滅

姑蘇

姑蘇城郭水茫茫  
往事流傳過客傷  
夜月人歌黃菜葉  
秋風夢繞白駒場  
火中烏合歸真主  
井底蛙猶笑子陽

天下車書今混一繁華終古勝維揚

直閣即事

清曉朝回秘閣重坐看宮樹露華濃  
綠窗朱戶圖書滿人在蓬萊第一峰

尹昌隆一首

昌隆字彥謙泰和人  
洪武丁丑賜進士第二授  
監察御史永樂間改左春坊中允再改禮部主  
事為尚書呂震所誣族誅有集

送孟潛陽先生教授邵武府學

理檉辭京都之官越閩嶺樵峰渺何許川塗邈脩迥霜  
雪歲暮絲朔風吹雲冷嚴程既難滯別思當自領清波  
漾寒色孤帆明夕景已過落星灣遠望杉關境橫經守  
清秩郡教知獨秉遐想諸生徒三席待開省

吳溥三首

溥字德潤崇仁人建文庚辰進士授翰林編修  
永樂初陞修撰遷國子司業有古崖集

胡若思云先生

志不事浮藻故其詩質實不浮殆所謂布帛菽粟而溫厚和平之意寓然見於辭氣之表其視世之纖媚工巧者不作矣

詩話博士聘君尊人詩格楚楚不若聘君之塵腐滿楮也

### 寄宋子環

聖恩寬逐客不遣過輪臺  
談笑潼關去雲霞仙掌開  
故鄉深念汝遠道竟能來  
明日相思處高秋鴻鴈迴

### 自歎

去鄉三十年顏貌總非昔  
昨日鄉人來相看不相識

悼外姪戴積善

遠樹千重暗江聲日夜哀終南山下路不見汝重來

王景一首

景字景彰以字行松陽人洪武壬子領浙江行  
省鄉貢進士授懷遠教諭遣戍雲南建文初召  
修高廟實錄陞禮部右侍郎兼翰林院侍講充  
副總裁官靖難後進學士

詩話靖難師入相傳學士請葬建文君以天子  
之禮然鍾山不聞有封穴或請而不允也古風

三首其一不無故  
主之思因錄之

古詩

皇天無停樞四運迭相迫朝陽忽東升悵望倏已夕伊  
誰執其馭六轡不遑息使我下土人俯仰空後後我願  
攀六龍駐彼扶桑域遨遊黃道中流光自輝赫萬物同  
一春欣欣布嘉澤義和不我與徒有淚霑臆晝短夜乃  
長何以屏陰慝

王 達 二首

達字達善無錫人洪武中舉明經為大同訓導

薦入官國子助教永樂初擢翰林編修遷侍讀

學士有耐軒天游二橐

黃才伯云耐軒詩有唐人風韻

詩話耐軒與大紳孟敷汝王希範號東南五才子其詩太便利不耐咀嚼然如送人人人都作起句云鶯啼細雨中一騎發城東又送人從軍作云細雨都門酒東風驛路塵未嘗不矜練也

### 題山水

一曲清琴酒一卮煙蘿贏得任棲遲  
千峰黛色嵐消後十里菱花子結時  
水氣入樓人不覺秋聲到樹鶴先知

世無謝眺誰同語對畫空成萬古思

題扇

葉暗前朝雨花飛昨夜風空山人不見春在綠陰中

王璲五首

璲字汝玉後以字行長洲人洪武中舉浙江鄉試以薦攝府學教授改應天訓導擢翰林五經博士永樂初進檢討再進春坊贊善下詔獄死

洪熙初贈太子賓客諡文靖有青城山人集

徐子



元云汝玉不及

高楊漸入清雅

詩話翰林四王並稱而汝王弟璉汝器璉汝嘉  
一門又有三馬其詩不費冥索斤斤唐人之詞  
吳人徐用理集永樂後詩家  
三百三十人以汝玉塵卷焉

### 和高季迪將進酒

君不見雲中月清光乍盈還又缺君不見枝上花容華  
不久落塵沙一生一死人皆有綠髮朱顏豈能久尊前  
但使酒如澠肘後何須印懸斗臨叩壚頭綠蟻香楊花  
卷雪春茫茫吳姬越女嬌相向痛飲須盡三千觴興來

狂笑縱所適慎勿畏他權貴客東風吹落頭上巾此夕  
獨醒端可惜

題採菱圖

有序

苕溪余舊所經遊秋高氣淒風清水落遠近漁  
歌更唱互答舟行沿洄恍若世外別來不知幾  
寒暑矣中吳徐希孟攜謝孔昭所臨松雪翁採  
菱圖索詩為作吳歌題其上不能不動江南之  
思也

湖南風信起湖北浪花多欲唱採蓮曲翻成採菱歌採  
菱歌斷汀洲暮何處却尋歸去路誰搖蘭艇笑相迎燈  
火遙生白蘋渡

新秋早朝

宮井梧桐一葉飛新涼先到侍臣衣蒼龍闕上銀河轉  
丹鳳樓頭玉漏稀曉仗分行環御輦夕郎鳴佩出仙闈  
自憐虎觀叨陪從簪筆慙無補萬幾

瓜洲道中

清江杳杳水連空  
江北江南綠映紅  
三月異鄉逢換火  
經春遊子怨漂蓬  
滿汀蘆葉鹽橋雨  
一樹梨花酒旆風  
遙望故山何處是  
依稀煙霧五湖東

方壺畫

紫府深沉白晝閒  
仙人歸去邈難攀  
當時暫謫來塵世  
寫遍江南雨後山

王洪五首

洪字希範  
和人和人  
洪武丁丑進士授行人  
永樂

初擢吏科給事中入翰林為檢討歷修撰侍講

左遷禮部主事有毅齋集

徐子元云希範詩清雅惜氣不足

吳明脚云希範擬陶風味似晉舟

中維興聲調似唐皆非人所易及

詩話希範詩最為孟啟所重至不敢與雁行其

對張宗海論詩自誦所作竊比漢魏張西而未

荅復曰終不作六朝語張曰子詩傍大李門牆

猶未窺其奧也希範始屈服今誦其詩率規仿

唐人具體而已

品當在孟啟下

## 歌風臺

赤精自天啓黃屋凌空開富貴歸故鄉遂築歌風臺佳

人弄瑤瑟故老持金罍酒酣自擊筑浩歌何雄哉颯爽  
龍虎姿曠蕩風雲懷顧為萬歲後英魂尚歸來回首望  
彭城孤臺亦崔嵬百戰功不成千載令人哀

擬劉公幹

園林多嘉木秀氣何蒼蒼石梁冠崇阿淥水流方塘行  
樂在良夜飛蓋復翔翔涼風振華纓明月揚其光清池  
散芙蓉秋蘭一何芳君侯壯思發逸藻凌風揚小臣信  
愚劣狂歌安所詳

擬陶彭澤

我家南山下前有嘉樹林好鳥鳴其巔涼風吹衣襟  
泛此尊中酒撫我膝上琴禾黍亦已繁桑麻藹餘陰  
如此良易足勞生非所任

畦樂詩

索居南野外頗與人事疎灌木蔭前庭隙地數畝餘  
蔬果因時藝薄言理其蕪聊以足晨夕過茲奚所須  
固窮亮吾分貪得寧非愚草糗可終身樂哉常晏如

舟中雜興

故國遍芳草高臺多大風河山千古在登眺幾人同野  
澤鳴山雉荒陂起塞鴻新豈不可見煙樹五陵東

王紱十七首

紱字孟端無錫人洪武中就徵坐累戍朔州永  
樂初以善書薦供事文淵閣拜中書舍人有友

石山房橐

胡光大云孟端律詩學大歷諸才子  
時有警句章炳如云孟端不羈之

才所作古詩類萃柳律詩類晚唐曾子啓云  
孟端觸景撫事即形之於詩隨其興之所至情



之所發初不詐其工拙而自合矩度 王汝嘉  
云蓋端幼負瑰偉之才游學邑庠時鄉之先進  
若四輔官周士平侍讀學士王達善長史錢仲  
益教諭呂志學引禮舍人浦長源輩皆以詩著  
名於時過從廣和甚為諸公稱許集中長篇短  
章春容爾雅無斧鑿痕而理趣兼至 李時遠  
云舍人詩清新典麗想見其人 繆  
天自云舍人詩格疎爽有松石間意  
詩話錫山自倪元鎮後孟端山水竹石瀟灑出  
塵筆蹤可繼人品亦未多遜在京邸與一商人  
鄰居月下聞吹簫聲明日往訪之寫竹以贈曰  
我聞簫聲用以簫材報其人不解事以紅氍毹  
為餽乞再寫一枝為配孟端大笑取前畫裂之  
又嘗退朝默國公從後呼之孟端不應私念曰  
是必索我畫爾後十年寫尺幅萬里遺馬子嘗  
見孟端為惠山僧畫竹茶壚圖羣賢題咏甚衆

今存顧典籍貞觀山莊當時夏太常景亦善寫  
竹譜藏家得其十幅不敵孟端之一也詩亦清  
疎一如其畫章舍人昞如狀云永樂初詔求天  
下文章之士洎善書者各二十八人登文淵閣  
公被首薦蓋與吉士並入  
直者此國史所未詳也

### 送楊德昂

我適桑乾歸君猶五溪去飄流若萍梗何繇復相遇迢  
迢江上山歷歷煙中樹後夜月明時相思渺何處

### 題秋菊軒

九月霜露零秋氣已云肅草木盡彫瘁而有籬下菊粲

祭如有情盈盈抱幽獨我欲餐其英采之不盈掬呼兒  
具雞黍白酒正可漉素心二三人於焉敘心曲陶然付  
一醉萬事亦已足詠歌柴桑詩千載想遐躅

寫竹寄顧謹中

秋聲起巫峽暝色迷湘渚悵望千里遙佳人渺何許幽  
期邈難值欲往復延佇中夜獨遐思西窗颯風雨

題成趣軒

桑麻日已長稼穡日已成門卷蔭榆柳隔屋縲車鳴生

平寡營為遂此田園情衣食喜不乏公賦尤寬平舉家  
情欣欣澹然忘世榮力作雖云勞濁酒時共傾豈意事  
高尚所樂安吾生

臘日

大化無停機寒暑如循環歲華忽云暮陽和亦已還人  
生百年內憂喜互相關顧匪金石姿安得長朱顏達人  
會斯理意與雲俱閒聞道媿獨晚衰也吾何歎

題青山白雲圖

我昔九龍山下住，結廬正在雲深處。  
日日看山還看雲，長教剪却當檐樹。  
無端一別猿鶴羣，馬蹄南北徒紛紜。  
塵塗底事拂衣晚，回首媿負山中雲。

送張知縣

作宰麻陽去，民風雜五溪。  
世傳盤瓠後，地接夜郎西。  
臘釀多藤酒，春禽半竹雞。  
到官應有便，莫惜寄緘題。

靜趣軒

竹樹陰森映短牆，蕭然絕俗似僧房。  
出城相去路三里。

閉戶獨眠書半床  
風煖林花飄几席  
雨晴沙鳥入池塘  
慚余擾擾紅塵客  
到此猶能百慮忘

送陳尚賓還靖州

嗟余湖海度年華  
爾復飄零更可嗟  
舊業暫歸翻似客  
異鄉重到即為家  
江連雲夢孤帆遠  
日落衡湘斷鴈斜  
後夜月明何處泊  
相思回首各天涯

峽中雜詠

峽裏山高多晝陰  
未昏煙景暗秋林  
停舟晚飯柁樓底

猶有夕陽明遠岑

靜樂軒 二首

竹几藤牀小硯屏  
熏風簾幙篆煙青  
閒齋幾日黃梅雨  
添得芭蕉綠滿庭

斗帳藏春日醉眠  
靜中惟與嬾相便  
尋常甲子無心記  
看得梅花又一年

皆山軒

嵐光飛翠入簷楹  
枕簟生涼暑氣清  
公退日斜新浴罷

坐看峰影過州城

塞上雜詠用偶武孟韻

漫天風雪掩穹廬  
客裏誰來問起居  
忽報鄉人喜新到  
寄來猶是隔年書

題靜照軒

尋常客不到山家  
松火寒爐自煮茶  
風雪閉門才十日  
不知春已到梅花

題枯木竹石寄李公實



晷畫溪邊水拍隄繞隄高樹倚雲齊君家正在樹深處  
滿地綠陰山鷓啼

茅齋煮泉圖

小結茅齋四五椽蕭蕭竹樹帶秋煙呼童埽取空階葉  
好煮山厨第二泉

錢仲益八首

仲益無錫人永樂初以翰林編修轉周王府長

史有錦樹集

魏仲房云先生詩有體裁麗而不浮奇而不僻易而不俚

詩話長史詩格爽朗惜遺集罕傳予從秦對  
巖前輩購得亟錄其八首猶未盡其蘊也

送范宗暉赴雲南從軍

投老怕送別送別即傷神況茲所別者乃是平生親行  
行赴何許遠在天之垠迢迢萬里餘欲見將何因近別  
猶不堪遠別情曷伸翻嫌交密友不若交疎人我昔初  
還鄉憔悴賤且貧子來客吾邑漂泊埋風塵一見如舊  
識歲久情逾真自謂同心交不獨雷與陳我入訓鄉校  
子來寓城闈燕語恒及酉諷詠或達晨中間罹變故別

我游江濱陶朱既遠越張祿遂入秦間幾四載會晤  
復喜頻明年上京都聘充戚里賓我亦被薦書謁選拜  
紫宸繆居容臺屬幸得聯朝紳與聞復聚首相見不隔  
旬念子有俊才倜儻無儔倫財輕大義重實謂勇且仁  
願言永相從誨語煩諄諄夫何事難料告別何趺趺從  
軍赴滇陽西去逾峨岷吾皇啓昌運萬物皆維新及茲  
艷陽月鶯花曜青春惜子獨遠去書劍行隨身騏驥豈  
絀羈鵬鷗非籠馴丈夫志四方豈必長相憐嗟我已暮

齒雙鬢垂秋銀受刃割老腸容易生酸辛子時在史館  
寅入出巳申不暇持一觴送子龍河湑江之水滔滔楚  
山青嶙峋吐此可奈何淚下霑衣巾

題王孟端畫送祖韶石歸惠山

危石壓寒篠高松挂枯藤長懷故山景況見故山僧僧  
今歸故山我歸嗟未能題詩送僧歸悵然離思增

中秋翰林夜集分韻得月字

雨餘殘暑謝夜久官事歇庭空起商飈雲霄吐華月於

時秋方半古桂黃初發玉堂集僚友清燕足怡悅送鉤  
行觴頻分韻催詩切玉輪懸中天光輝轉明潔有如坐  
冰壺爽氣徹肌骨微聞更漏響漸見明河沒人生寡歡  
會員魄亦易缺莫辭通夕玩動是經年別

牧牛圖

東臬二月春草生江邊放牛花雨晴牧兒唱歌牛斲草  
穩坐牛背隨牛行牛角攢攢耳濕濕斷隴荒陂隨意入  
煙蒲風柳不勝情日暮歸來荷蓑笠我本山林牧牛叟

濫著朝衫今白首，儼買江南黑牡丹。  
乞取閒身老農畝。

青山白雲圖

連山盤盤隔溪水，翠滴風光淨如洗。  
松梢日出初雨晴，滿地白雲收不起。  
溪窮路轉石徑斜，隔溪遙見山人家。  
柴門深閉人不見，暖風吹落朱藤花。  
良工貌得無窮景，坐玩令人發深省。  
何由築室住山間，長卧雲窩弄秋影。

題江南春雨圖

羣山鶻突雲模糊，長蘿遠水連平蕪。  
孤村絕浦望不極。

幾家茅屋懸魚罟輕舟數點小於葉出沒煙浪同飛鳧  
江空雨勢來不已水風颯颯吹菰蒲前山禪宮白雲際  
明滅時見金浮屠貌將一段丘壑趣寫出萬里煙霞圖  
憑軒寂聽無所見彷彿似有青猿呼我昔南遊會稽上  
雲門六寺尋僧徒手支枯筇躡短屐窮幽陟險隨樵夫  
曉雲漫天失老鶴暮雲擁樹聞飢烏石厓松瀑濺飛雪  
水聲活活風胡胡若邪溪深不可渡沿流細路行縈紆  
歸來濯足憩小軒曾中塵氣一點無自從江海困奔走

衝寒觸暑趨長塗追思勝賞不可到十年南望空嗟吁  
朝朝覽鏡獨惆悵兩鬢雪白容顏枯東陽山人特好古  
寶此名筆如瓊珠吳箋一幅不滿尺懷山卷海置坐隅  
鋪牀展軸看未了何異短褐藏天吳王郎妙手信莫及  
功與小米論錨銖想當運意揮染際倒瀉水墨翻金壺  
祇今此景在何處欲往不得歲已徂還君此畫重太息  
嗒焉長吟據槁梧

錢達可山房



苦憶錢夫子幽居嶧嶺山問梅殘雪外采藥亂雲間塵  
暗芸籤冷香銷蕙帳閒斷腸泉上月依舊照松關

遊蓬萊道院聽李天山鼓琴

仙人鼓琴花滿庭我亦洗耳為君聽風搖空林夜瑟瑟  
泉落幽澗秋泠泠平生青袍作行客千載絕調聞廣陵  
曲終日落醉歸去無數好山天外青

梁潛一首

潛字用之泰和人洪武丙子舉鄉試授訓導永

樂初召修實錄陞翰林修撰歷右春坊右贊善  
帝北狩留監國中讒死有泊菴集

楊東里曰用  
之詩高處逼

宋晉

### 合州寫懷

忘却儒官冷誰為蜀道吟一身猶長物萬事豈關心水  
鳥窺魚立山雲帶雨沉人生聊適意莫受旅愁侵

鄒 緝 一首

緝字仲熙吉水人洪武庚辰進士除星子訓導

永樂初入為翰林檢討歷官左春坊左庶子有  
素菴集

翰林院齋宿聽琴詩

并序

永樂三年春正月丁未上將祀南郊誓戒羣臣  
致齋三日百官既受誓各就宿別館於是侍讀  
曾公日章修撰錢公仲益徐公益昭檢討蘇公  
伯厚沈公民則暨無錫王公益端與予凡七人  
皆會宿於翰林之公署於時天宇澄霽月色清

朗諸君子相與秉燭坐於公署之東偏沈公善  
琴因請鼓之作商調數引舒徐安適淳古澹泊  
有三代之遺音坐者聽之莫不心暢神怡乃相  
與分韻賦詩以紀其事且要孟端為之圖云

禁直夜迢遞齋居澹無為同心聿來集良友具在茲懽  
言適嘉會秉燭坐彈碁華月照虛牖微風動綺帷上客  
發幽興援琴揮素絲一彈孤鶴舞再鼓心神怡清商既  
激烈雅調亦舒遲秋鴻唳遠空猗蘭芳歲蕤俯仰極餘

韻邈與高山期燕賞亦云洽傾耳遂忘疲沉吟永終夕  
逍遙起遐思仰觀庭戶間爛然明星垂旭景不知曙永  
言歌此辭

蘇伯厚二首

伯厚名埜以字行建安人洪武中以薦授建寧  
府學訓導遷晉府伴讀永樂初擢翰林侍書遷  
檢討以子鎰仕贈吏部員外郎有履素齋集

詩話蘇君傳詩絕少其五言神意間審綽有魏  
晉風陳嗣初稱南閩偉奇超卓之士必以蘇先

生伯厚為之

首不誣也

偕諸公齋宿聽琴作

玉署宿齋居盍簪諧素約坐中有鳴琴宮商時間作波  
澄楚江秋露下九臬鶴流泉響幽澗靈籟起寥廓維時  
雨初霽微月映疎箔鑪熏輕烟裊燭花紅燼落春風送  
餘寒夜久覺衣薄清談雜今古亦足資一噓相對竟忘  
眠更取茶甌淪雞鳴整朝冠晨鐘動高閣

畦樂詩

青山遶我屋垂柳蔭我門來往絕塵鞅世事邈不聞  
惟有衣褐徒鄰曲相與言孰云生計拙亦有數畝園  
清晨荷鋤去除彼蔓草根但使無饑饉豈惜筋力  
煩濯足清澗濱矯首觀飛雲牀頭有濁酒欣然自  
開尊

張

洪一首

洪字宗海常熟人洪武中謫戍雲南永樂初  
授行人仁宗召入翰林改修撰有集

詩話張宗海集一冊予在史館曾  
見之無足采者仍錄東門行一首

### 古東門行

僕夫顧我悲轅馬蹶不行古來離別地  
青草不復生居人攀桃李帳望難為情  
流塵起阡陌遠樹花冥冥莫向秦東  
亭唱此東門行土中有死骨聞之復心驚

曾烜二首

烜字日章以字行吳江人洪武間以歲貢授黃陂知縣考最陞翰林院侍讀同修永樂大典使



交趾卒于富良江

舟至辰陵磯與楚百戶言別

江到荆湘兩派分  
客情無奈況離羣  
爾從三峽迎春水  
我過重湖望楚雲  
白帝至今啼蜀魄  
蒼梧何處弔湘君  
孤舟夜向巴陵泊  
一曲商歌不忍聞

寄友人

與君離闊十年餘  
兩過江濱候起居  
咫尺猶如千里別  
飄零不寄一行書  
何時夏口同傾蓋  
此日王門好曳裾

若問故人何似者鬢絲今已不勝梳

黃守一首

守字約仲以字行莆田人以汀州府學教授擢  
翰林院檢討有靜齋集

題燕文貴秋山蕭寺圖

迴崖列岫鬱相連兜率樓臺際碧天飛鳥已還秋色裏  
疎鐘猶在夕陽邊溪橋緩轡官人馬野飯維稍客子船  
記得宦游逢此景披圖不覺思茫然

虞謙一首

謙字伯益金壇人洪武中由太學生擢刑部郎  
出知杭州府永樂中召為大理寺少卿仁宗監  
國奏除都察院左副都御史轉大理卿有玉雪

齋橐

楊東里云大理善寫山川水石  
幽澹簡遠亦以工詩名於時

田家晚泊

風磴翻危葉霜槐出斷根過橋逢野老倚杖候柴門  
犬熟迎客歸鴉遙認村茅檐投晚泊煙霧斂初昏

熊直二首

直字敬方其初冒姓胡吉水人永樂中舉人以  
子槩貴贈右都御史有西磻集

立秋後有懷京洛諸故舊

秋序昨夜至炎蒸尚復然青山不改色黃葉墮我前物  
性固細微乃得氣之先人生宇宙間俛仰終百年質非  
金石固豈得恒雕鐫朱顏亦易失皓髮無由玄念我平  
生友聚散如雲烟行止固不齊所賦良由天昨尋東籬

菊欲買南山田安分乃吾事富貴甘棄捐

瀟湘雨意圖

萬竹叢深日未晡寒江煙雨翠模糊東風無限瀟湘意  
獨倚篷窗聽鷓鴣

陳繼二首

繼字嗣初吳縣人經歷汝言子用薦授五經博士  
領弘文館事進檢討有怡菴集

詩話嗣初為惟允遺孤惟允坐法誅家無長物  
惟閱過書二萬餘卷其母吳教之成學以薦授

五經博士時獻陵於大內之西思善門闢弘文館命楊學士溥主之嗣初與王侍講璉入直焉其詩本之家學持論以為詩者非得乎天地之清氣則無以極其妙今所存怡菴集一十五卷詩未之錄嘗見題漁父圖有云夕陽漸紅江轉綠分明畫出一幅漁村晚景也

烏夜啼

宮井烏啼宮樹碧月色生寒露華白啞啞不斷深夜閑  
明朝車馬天際還綠窗美人歡不寐未曉凝妝貼珠翠  
秋夜雨中懷孟端

愁雲接地陰城漏更沉沉寒雨驚秋盡殘燈入夜深淒

涼千里客惆悵百年心誰料分攜後防邊直到今

陳亢宗 一首

亢宗名宗以字行永嘉人官兵部員外郎

詩話員外午門觀燈應制詩景陵品居第一然  
實遜曾襄敏陳文定諸公送友一律調雖荏弱

源本  
隨州

送友人歸崑山

官亭把酒送君歸回首吳山驛路微久別方期同笑語  
相逢那忍又分違平蕪積雨迷征騎疎柳寒煙掩舊扉

此去思親還望闕朝朝應對白雲飛

袁珙一首

珙字廷玉鄞人以相術拜太常寺丞有柳莊集

詩話寺丞得相法於別古厓識文皇於潛邸遂遷寺秩然家本土族其父彥章任元為翰林國史檢閱世稱菊村先生嘗作布衣歌云我家頗讀書初非田舍翁蓋道其實也寺丞於九流百氏靡不涉究歌詩亦能入格不失菊村家數

長相思

有美人兮天一方丹霞為織雲錦裳盤龍舞鳳交鴛鴦



昔年飲我瓊瑤漿贈我白玉雙  
明璫欲往從之楚山  
長安得羽翼同翱翔望望不見  
令我傷仰天悲歌涕  
浪浪明月在戶光滿堂牽牛織  
女遙相當長相思愁  
未央

袁忠徹

一首

忠徹字靜思珙之子以父廕由鴻臚序班歷  
官尚寶少卿有符臺外集

和寔郎中問筮菴見贈韻

夕雲斂餘暉稍稍歸鳥集清磬林際浮樵歌峰外急懷  
人南斗邊露下銀漢濕瑶草春復生深山共誰拾

徐晞一首

晞字孟晞江陰人永樂中由縣功曹累官至  
兵部尚書有登陽遺藁

感懷

十年騎馬戰龍沙不道功成兩鬢華昨夜思歸有鄉夢  
江南春色遍梅花

劉 廌 二首

廌字士瑞青田人誠意伯基之孫洪武庚午襲封辛未貶秩丁丑戌甘肅尋赦還永樂中卒於

家有盤谷集

詩話趙周臣自號閒閒居士士瑞亦自號閒閒子其集名盤谷者士瑞夢爵之後貶秩歸農築室於青田舊宅之西雞山之下因其地山水盤旋故以名焉詩師吳興沈原昭

孟春贈徐仲成

故人訪幽居時當孟春節寒氣尚嚴凝同雲靄欲雪

長論懷始舒高吟興不絕開窗對松竹蒼翠色可悅  
豈不念榮華泉石甘守拙閉門有餘暇開卷對前  
哲長嘆古今事理義同一轍世隨氣化遷運逐人情  
別雖非聖賢資勉焉慕貞潔矻矻且獨守默默誰  
與說惟有知心友時過共掀揭但願無聞知豈敢尚  
英傑援筆賦新詩舉觴對明月高歌神鬼驚長嘯  
天地闊彭澤千載人百世誰能越高山與流水此興  
不可遏

春游田家四景之一

竹籬茅舍兩三家  
屋外青山綠樹遮  
行客偶來春已暮  
山南山北杜鵑花

郭武

五首

武字吳隆贈定襄伯鈺長子官尚寶司丞詩見

聯珠集

晚渡白馬湖

輕風小寒吹浪花  
新柳茸茸啼乳鴉  
平湖一望幾千頃

遠水連天飛落霞斜陽忽墮澄波底白鳥猶明山色裏  
巖更何處鼓鼙鼙權歌未斷漁燈起

寄劉草窗原博

空堂獨坐葉紛紛一雁南飛不可聞野色連天迷遠望  
高城落日亂寒雲故人眼底無多在客思秋來又幾分  
莫怪臨風倍惆悵江鄉猶憶白鷗羣

江南懷古

隔斷中原數百年囊沙堪笑況投鞭桓温不合留王猛

安石終能舉謝玄日落暮雲斜度鳥雪消春水遠連天  
子山空有江南賦北府淒涼最可憐

江上即事

綠水橋邊酒店白鷗沙上漁家山前山後春雨江北江  
南落花

宿澧陽

蘋花風急水茫茫今夜孤舟宿澧陽誰在江城吹畫角  
五更殘月一天霜

沐昂一首

昂字景顯黔寧昭靖王之子以左都督鎮守雲南卒贈定邊伯諡武襄有素軒集

詩話定邊平麓川之寇威著西南而能以餘暇留情文詠辨明初名下士官於滇及謫戍者自和仲經以下二十一家詩凡二百五十首目曰滄海遺珠揚東里序之謂當時選錄諸家劉仔肩過畧王偁雖精且詳猶未免有遺惟沐公所擇和平婉麗可玩可傳其賞識若此

送胡榿軒還永昌

有客乘驂過洱西平原春草正萋萋人煙迢遞連金齒



山勢逶迤拱碧雞  
流水小橋楊柳綠  
落花微雨鷓鴣啼  
遙知別後相思處  
雲樹蒼茫夢欲迷



明詩綜卷十九

總校官庶吉士臣張能照

校對官檢討臣龔大萬

騰錄監生臣朱懷玉

欽定四庫全書薈要

集部

明詩綜卷二十一



詳校官編修臣王天祿

欽定四庫全書薈要卷二萬四百九十三

兵部

明詩綜卷二十

翰林院檢討朱彝尊編

蔡八首

蔡字子啓吉安永豐人永樂甲申賜進士第一  
授翰林修撰歷侍講侍讀學士左春坊大學士  
進詹事府少詹事卒贈禮部左侍郎諡襄敏有

巢睫集

楊東里云子啓迅筆干言不費思索而  
理致文采皆到雖沉思者有所不及又

云子啓詩如園林得春羣芳奮發錦繡爛然狀  
寫之工極其天趣他人不足彼嘗有餘王行  
儉云曾公詩詞雄放清麗出入盛唐諸大家  
徐子元云曾詩如天馬行空不可控御袁永  
之云曾公浩若懸河所乏嚴潔王元美云曾  
子啓如封節度幕兵東征鮮華誰香精騎殊少  
項子長云子啓天才雄麗所乏者謹嚴精潔  
耳穆收甫云曾詩富於才情湧瀉如泉在永  
樂中可稱獨步顧玄言云少詹才長七古該  
博逸蕩惟以健捷為工頗以鏘靡為累蔣春  
甫云少詹詞鋒艷發若青萍倚天韻語清華  
如紅蕖透水又如金羈玉勒微有蹄鬣之恨  
靜志居詩話子啓下筆不休不事推敲偶合絕  
墨五言如斷雲京口樹殘月廣陵鐘暝色迎官  
舫春寒到客衣雨從江北少山到宿州多殘燭  
明官舫疎鐘出郡樓寒潮瓜步月殘雨秣陵舟

七言如雲中鸞鳳扶雕輦水底魚龍識翠華  
草綠野塘多是水雨晴沙路不成泥平鋪碧甃連  
馳道倒瀉銀河入苑  
牆均不失唐人風格

### 呂梁洪

洪流昔懷襄區域信茫昧斯民靡寧居嬰此昏墊害呂  
梁塞衝波滔天勢橫潰怒霆鬪鏗旬飛瀑瀉澎湃神哉  
夏先后敷理乘四載沛然導東注下與百川會造化有  
設險惟此乃其最扁舟沂奔流涉歷今已再水師身手  
捷徑渡良足快緬懷胼胝勞遺跡遠猶在偉茲疏鑿功

萬世終永賴

題孟王端墨竹送人南歸

十年官舍長安陌，欲種篔簹愁地窄。  
軒前有此八九竿，蒼然一片瀟湘色。  
九龍山人思不羣，曾襟灑落如此君。  
筆端颯颯起風雨，紙上漠漠生烟雲。  
幾回看竹稱竒絕，為寫琅玕照冰雪。  
縱橫屈鐵金錯刀，滿堂便覺秋蕭騷。  
周郎愛竹癖於我，興至時尋竹邊坐。  
我生疎懶無所為，但與江海同襟期。  
喜君愛竹有如此，便以此圖持贈之。



丹楓白水江南路歸帆直向湖中渡慎莫提攜過葛陂  
恐化羣龍上天去

駕發臨城

雞鳴寒漏徹車駕發臨城殘月千山曙浮沙一路平雲  
光隨鳳輦露氣濕霓旌馬上頻回首猶看燎火明

荏平

地旱空多井林疎遠見樓平山通縣界漂水入河流過  
客詢張鎬鄉人說馬周北來多古蹟惜未得淹留

涿鹿道中

遠樹孤城出高原  
四望遙山從平地  
起雪到暮春  
消細草承雕輦  
垂楊拂御橋  
愁連易水上  
風色正蕭蕭

德州

幔城初解向朝曦  
霜冷重裘曉未溫  
小邑有城皆壘土  
荒原無徑可通村  
郵亭過客頻詢路  
茆屋遷民久下屯  
此去景陽州不遠  
建牙鳴鼓是營門

別弟憲副鼎

莫向尊前唱渭城老來離別最傷情江南渺渺孤舟夢  
嶺外迢迢萬里程驄馬曉嘶霜氣肅鱷魚夜徙海潮平  
到時應及春初候先報京華白髮兄

夾溝

東風吹暖柳絲柔十里青山繞夾溝馬上逢人相借問  
計程兩驛到徐州

周述 三首

述字崇述吉水人永樂甲申賜進士第二授翰

林編修進諭德陞左庶子有東墅集

詩話唐人讌集賦詩每推一人擅場如昇平公  
主席上李端擅場送王昶鎮幽朔韓翃擅場劉  
相巡江淮鏡起擅場他未暇悉數永樂中命翰  
林賦白象則胡庶子廣第一賦神龜則王贊善  
汝玉第一午門觀燈則陳員外宗第一然員外  
觀燈之作比之周庶子陳祭酒似猶遜之實非  
也擅場

玩秀軒

華軒臨清流秀色堪攬結霞彩相蕩漾波光互明滅花  
飛渡頭春帆落洲上月縱觀心目超靜對形神悅應共

滄浪人濯纓笑予拙

賜觀燈詩

今夕逢元夕歡聲遍九垓  
星臨銀漢動月傍碧空來  
紫禁千花繞金門五夜開  
聖情同宴賞玉漏不須催

寄楊顯道先生

我憶楊夫子風流似昔人  
素琴長對月白髮不憂貧  
彭澤陶元亮稽山賀季真相  
思欲相見烟樹幾回春

周孟簡一首

孟簡字孟簡吉水人永樂甲申賜進士第三官  
詹事府丞出為襄府左長史有竹磔集

丙午除夕

為客逢今夕寧親憶去年一尊終不醉孤館自無眠家  
在雲山外身依日月邊何堪雙鬢改又值歲華遷

李時勉七首

時勉名懋以字行江西安福人永樂甲申進士  
選庶吉士授刑部主事進侍讀改御史官終國

子祭酒卒諡文毅改諡忠文有古廉集

詩話忠文古之遺直不以詩名而扶風數篇雖未遠擬秋胡要非拙手可辨子嘗獲公致湯都閩手書楷法道勁乃知書亦能品也

古詩為扶風竇滔妻作

七首

深閨有思婦慘悽亦何為容華不自惜獨理流黃機言  
將成匹帛多裁游子衣衣新忽變故恩愛從此衰以茲  
殷勤意翻作長恨辭

蘭茝被幽畹桃李媚春陽新婚結綢繆鞶衿散芬芳弃

置父母歡婉婉君子傍白日麗朝彩朗月澄夜光矢心  
以相顧願為鴛與鴦

西墅起高臺迢遞憑雲岑中有嬌艷女當窗弄清音  
容蕩以肆居然變同心魚目奪明月讒口鑠黃金不見  
冀中饑惻愴戾戾吟

高車擁旌旆輝映漢江曲富貴一朝異窈窕辭別屋言  
笑落日遲浩歌湘水綠山川不可踰安得遙相逐佳麗  
誠足珍涼薄難見錄



滔滔江漢流到海不復返千里得所歸中復厭婉婉在  
昔枉綏授駕言不辭遠誰知三周御却道羊腸坂芬芳  
空自持白日忽以晚

昧旦不能寐攬衣起中堂織縑與織素誰復知短長咫  
尺組幽思迴還遂成章絨之戒僮御欲以寄遠方宛轉  
達苦志敢期昔所仇

別久意恒親覽辭念愈結巾車適千里倏忽已超越嗚  
琴諧古調恩愛感離闊夙心諒所負慙歎對明月捲言

固終始皓首以相悅

陳敬宗 二首

敬宗字光世慈溪人永樂甲申進士選庶吉士授刑部主事改翰林侍讀轉南京國子司業陞祭酒卒贈禮部右侍郎諡文定有澹然居士集

陳卧子云文定詩典

質和平感世之風

詩話祭酒清德與李忠文並重號南陳北李詩特雍容温粹洵稱感世之音

元夕賜觀燈詩

劍佩清宵近峰巒翠閣重花明金殿月香度玉樓風拜  
舞諸蕃集歡娛萬國同遙聞歌吹發五色度雲中

白蓮

太液澄波濯素容玉衣垂影水晶宮月明無處尋顏色  
只信香飄十里風

王英七首

英字時彥金谿人永樂甲申進士選庶吉士歷  
翰林修撰侍講再扈駕北征累官南京禮部尚

書卒諡文安改文忠有泉坡集

蔣春甫云尚書詩雄壯宏大氣

象自

好

詩話西王密切謹嚴句無浮響如別路斜陽京口樹他鄉明月洞庭船挽得瑀弓射飛虎賜將宮錦繡盤螭舊館空餘秦地月古壇猶似漢宮秋皆琅然清圓可誦也

自勵

團團匣中鏡皎皎流素光鑒物無遁形妍媸安得藏  
經時苦昏翳游塵漫飛揚顧此三歎息胡為失其常  
拂拭去瑕垢精采復煌煌衆汚不可染持已貴自臧恒當慎

夙夕惕然以自防

哀義士周益詩

步出崇明城遙望城南里天寒飢鳥啼日暮北風起  
綠楊何蕭蕭衰草生故壘傍有三尺墳葬此千載士  
昔時從戎馬一身赴邊鄙但全手足愛百戰何足畏  
崎嶇越關山辛苦乃云逝傷哉有斯人薄俗誠所愧  
遺風何凜然聞者皆墮淚

贈伍子正還巖山舊隱

積翠羣峰出盤雲古洞深澗花春帶雨山木晚澄陰  
後鶴多年別江湖萬里心還攜謝安妓歸去一登臨

秋初有懷呈曾侍講彭修撰二公

律應清商動涼生大火流梧飄金井露雁度玉門秋爽  
氣消殘暑砧聲報遠愁佳期七夕近乘月却登樓

榆林直宿有懷邵菴學士對月之作

榆林春夜漏聲遲獨憶奎章對月時翠袖清歌看駐輦  
彩箋紅燭坐題詩連雲尚有青山在夾路應多綠柳垂

北望窮荒凋落盡昔年文物倍增悲

舟過孟城

畫船撾鼓過孟城兩岸桃花春水平  
今夜湖中好風景  
直須看到月三更

淮安別回御史

遠別悠悠鄉夢頻逢君況是異鄉春  
可憐湖畔青青柳  
又折長條別故人

王直十六首

直字行儉泰和入永樂甲申進士選庶吉士歷

翰林修撰侍讀進學士擢吏部尚書加太子太

保進少傅兼太子太師卒贈太保諡文端有抑

菴集

李原德云抑菴詩文清緻追古作者錢原博云王公含咀英華出入經史文辭典

雅超

邁古今沈景倩云王文端以庶常為文

皇所卷不數年召入內閣書機密文字授修撰

駕幸北京太子監國與黃淮楊士奇三人輔導

儼然宰相職矣帝再幸北京公扈從進侍讀仁

宗朝為侍讀學士又以庶子兼侍讀學士宣宗

時進少詹事兼侍讀學士英宗即位充實錄總

裁尋進禮部左侍郎兼翰林院學士正統六年

禮部闕人始命出部治事自此以後雖拜吏部



尚書加保傳不復兼學士矣公墓志本傳中云  
公自言西楊不欲我同事內閣出我理部事據  
此則公在內閣凡歷五朝為東里所擠始出理  
部事其初固閣臣也而海鹽鄭氏豐城雷氏太  
倉王氏紀述宰輔更不及此公何邪

鍾廣漢云東王諸體斐然巍巍溢目

詩話東王不得爰立西楊之力也觀其撰東楊  
文集序云直之去翰林惟公深惜之而反為忌  
者所病夫士之進退出處有命焉非人力所能  
勝奚以病為哉又題東里翰墨卷云楊氏與王  
氏世有連予竊祿翰林從先生者三十七年教  
益多矣予之事先生負恃親愛於凡所當言者  
盡言不諱則有之非理而評語則奚敢後予去  
翰林或謂出先生意蓋言語以為階豈旁觀側  
聽者固能知其情邪而予實不自知也譯其辭  
雖隱而情事躍如矣特其人長者故為東里作

傳止揚其善已君子哉若人乎其論詩有云詩者志之所發也方其動於中而形於言雖各有自然之機然非取法於前人而欲從容中度不失其正亦難矣覽集中詩未遽出西楊下顧元美元瑞諸公品隲詩家甚廣獨不及馬何與

騶虞詩

有靈者獸是曰騶虞環滁之山以潛以居其靈維何莫之與匹既玄其文而白其質猊首虎軀尾參於身一日千里孰知其神振振仁厚不踐生草彼物之生亦不以飽維天生之亦自天成聖明之世為祥為禎維今天子

道德純至肫肫皇仁遠邇一視昭事上帝曰敬曰誠孚  
於下民皆樂其生皇天惟親兆民胥悅神祇效靈騶虞  
乃出石固之山榮光燭天百獸從之其行蹉蹉彤軒文  
檻帖然自致翼以祥飈獻于天子天開日晶慶雲垂英  
百僚歡趨騶虞在廷騶虞在廷實為大瑞龍馬神龜乃  
同其類昔在太宗文德武功騶虞之來頌聲泝泝維今  
天子祖武是繼騶虞復來以昭盛治穆穆聖明天眷滋  
彰萬世之隆萬世之光小臣作詩以歌盛美播之韶鈞

垂示無已

艷歌行

翩翩春歸雁秋至復來翔如何遠游子兄弟各異方  
山川何迢迢參辰夜相望寒風日以厲零露結為霜空林  
靜無人但見明月光徘徊不能寐徒倚臨中堂睠彼南  
飛翼故鄉安可忘

吳城山阻風雨

泊舟吳城山勝覽斯為最登臨記曩昔正與匡廬對茲

晨一寓目烟雨森晝晦莫辨咫尺間安知天地外微茫  
彭蠡澤洶湧百川匯長風翻洪濤歛見蛟鼉背夙聞垂  
堂戒行止焉敢昧

發儀真道中登岸延覽憶前行曾侍講王修撰

舟行苦遄迴登岸曠心目天清浮雲卷野秀新雨足澶  
漫衆流會杳靄羣山綠風暄花意亂日暖鶯聲續却憶  
同心人無由踵前躅

題山水贈楊熙節

郭純永嘉人善畫自疇昔興來展豪素滿眼絢金碧永  
樂年中獨擅塲拜官得在內作坊時時承詔恣點染九  
重出入生輝光洪熙改元初進位閣門使常言酒後妙  
入神傾倒壺觴不知醉供御之外頗自珍一筆豈肯輕  
與人忽持此幅來贈我令我坐憶江南春江南何處最  
奇勝錢塘西湖誰與並諸山遠近翠若圍艷杏天桃色  
相映橋上行人駿馬過橋邊桂楫揚清波岳王祠下喬  
木老林逋宅前芳草多春光如此佳可賞遠道迢迢心

養養朝回看畫悄無言夜雨寒總神獨往山陽義士真  
好奇平生脫略誰得羈昨日到京師秋風露華白訪我  
小瀛洲暫作神仙客飄然復往不可留拂衣欲向東南  
游題詩卷畫贈爾去相思定倚新城樓

題夏珪風雪江村圖

江天漫漫雲氣黑江風蕭蕭雪花白荒村古道人跡稀  
惆悵津頭遠行客黃蘆低折沙草平遙望不見長安城  
蹇驢凌兢縮如蝟鞭驅還欲西南征四山溟濛日應晚

辛苦羸僮未遑飯深林歸鳥棲已定茅屋人家去猶遠  
吁嗟乎夏珪之筆凌范寬滿堂凜凜生畫寒卷簾看罷  
重歎息歲晏高歌行路難

題周永新所畫山水

括蒼周永新作畫有竒趣京師為我寫此圖彷彿鄉園  
昔游處我家舊住西昌城西昌山水天下清金華武姥  
最竒絕連峰疊巘高崢嶸仙宮梵刹在其上寶殿珍樓  
屹相向白象青猊不見過翠鸞綵鳳猶聞唱逶迤岡阜



瞰滄洲下有長溪萬古流  
越王臺荒莎草合龍君廟冷  
松篁幽平沙漠漠行人小  
巖藹林霏沒歸鳥石潭魚艇  
自夷猶茅屋人家更深杳  
我昔捫蘿上紫岑振衣獨立  
清煩襟天台微茫玄圃闊  
蒼梧縹緲瀟湘深山中仙子  
顏色好坐閱年華後天老  
便擬相攜賦遠游萬壑千峰  
拾瑤草塵事羈留竟獨歸  
別來幾度見春暉逢人尚說  
彫胡飯當暑猶懷薜荔衣  
只今容髮半衰朽事業文章  
復何有況聞荆棘長芝田  
側望天涯謾騷首高堂看畫

增慨慷如此好景非尋常君恩未報心尚在何時乞身  
歸故鄉

顧進士所藏畫虎

趙廉畫虎名天下好事求之不論價披圖忽然見此物  
坐卧雖殊貌閒暇岡頭樹綠風氣涼下有流水聲浪浪  
蕭條古路絕行迹但見藜藿如入長深山麋鹿可充腹  
莫向田家取黃犢禍機一發戕爾軀豈若安常一生足

秋江獨釣圖

薰葭漸瀝秋雨霜明月照水天蒼茫扁舟靜夜泝空澗  
驚起沙邊鷗鷺行釣車不用置在傍此心寧羨鯉與魴  
扣舷獨往歌滄浪歌聲激烈增慨慷山中之人遙相望  
謝庭循自畫秋景

洞庭八月秋風早楊柳蒹葭漸應老柳下茅堂遠市廛  
寂寞閒門對幽島居人無事不出門林深地僻如荒村  
門前道上車馬絕過雨蒼茫空蘚痕江清水落沙石出  
水底渾疑見鮫室鷺鷥鷓鴣皆有情唳喋喧呼亂晴日

我家故業連滄洲，  
潁水文溪遶舍流。  
圖中景物渾相似，  
見之令我增離憂。  
君今善畫得供御，  
下筆縱橫有神助。  
何時為埽寰瀛圖，  
一葉凌波向南去。

帝京篇贈鍾中書子勤

曙闕霜

一作嚴

鐘啓宵衣玉

一作促

漏催雲移宮扇靜

一作徹

風引御

香來劍履羣公侍，  
簪裾萬國陪小臣。  
瞻盛美稽首頌康  
哉

雪

大雪下龍墀蓬萊曙色移

一作倪曙輝

光通九華殿花滿萬年

枝賦擬梁園作歌憐郢曲詞西山臨魏闕相對玉參差

月下對酒

萬里浮雲盡孤城畫角殘月從今夜滿人在異鄉看隱  
隱關山遠淒淒風露寒客愁難為減應賴酒杯寬

景陵挽歌

靈馭陪仁考仙遊侍太宗珠丘連翠殿玉匣閔玄宮海  
宇攀號切天庭陟降同遙知六龍駕長度五雲中

得兄行敏書知在臨清將北上

嶺外三年別天涯萬里迴書從今日到船向幾時開落  
日關山遠清秋鴻雁來重陽看漸近同醉菊花杯

雨

野迴雲容黑汀長雨氣寒春隨花片減愁向酒杯寬亂  
水通流急孤舟逆上難白鷗渾自得來往任風湍

章 敞 二 首

敞字尚文會稽人永樂甲申進士改庶吉士授

刑部主事歷員外郎中改吏部擢南京禮部右  
侍郎有質菴集

詩話侍郎兩使南交却金不受以  
清德聞其詩不費雕鏤間合梁度

鄉山圖為魏仲房題

連山際東溟層巒儼天設陽林耀青葩陰厓餘積雪原  
田莽迢遞烟霞互明滅時菊萎舊裳蒼苔閱行轍雲谷  
杳難尋澗芳那可掇懷故念易盈覽物意彌結游目愜  
心賞幽期緬乖缺一為莊鳥吟浩歌徒激烈

長安雪夜歸興

半生歲月老幽燕  
鏡裏蒼顏豈似前  
曾道休官身便樂  
夢書封事乞歸田

周 忱 二首

忱字恂如廬陵人永樂甲申進士改庶吉士授  
刑部主事轉越府右長史超拜工部右侍郎巡  
撫江南陞戶部尚書改工部卒諡文襄有雙崖

集

王行儉云公詩文  
出入唐宋諸大家



詩話進士改庶常相傳自永樂甲申始是科命  
解學士縉選得二十八人以應列宿文襄自陳  
年少乞讀中秘書時人謂之挨宿云致洪武乙  
丑有楊靖徐孟昭郭資皆以庶吉士稱大誥亦  
載庶吉士廖孟瞻以受誅則又在乙丑之前  
矣至戊辰年解縉亦為中書庶吉士蓋信不始  
於永樂初也其後文襄鎮撫江南凡二十二年  
以經濟名世詩非所長然性好儲書其歲室詩  
云羣經既竝蓄百氏無弃捐所至每充棟來往  
勞車船嗜學如此宜其吟諷亦未遠遜二十八  
人也故彭惠安贊云學博而邃  
沛乎有容二十八宿誰能右公

### 徐州過桓山宋司馬桓魋之墓

愚哉宋司馬仲尼安可輕欲害其如何不知天所生此

金方口人卷二  
卷二十一  
山昔葬骨廢穴尚留名宿土消飯含飄風散精靈日中  
狐兔集夜半鷓鴣鳴當其始建時久遠勞經營荷鋪萬  
夫集石椁三年成詎知百世下牧豎來縱橫君看孔林  
樹千古猶青青

尋天台李道士齋

瑤草迷行徑丹臺近赤城山川遙在望雞犬不聞聲谷  
靜松花落橋橫澗水鳴雲間雙鶴下疑聽紫鸞笙

李昌祺 二十七首

昌祺名禎以字行廬陵人永樂甲申進士選庶吉士擢禮部郎中出為廣西左布政改

河南有容膝軒草運甃漫橐

李時勉云李公詩有典則溫厚

者有流麗痛快者有春容浩瀚者陳德遵云公於詩本之以理充之以氣故其雅澹清麗宏偉新奇無所不備不必遠較於占就今而論千百之中不過數輩而已鄭德新云先生詩清新富麗音調爽澈隱然有一唱三歎之音蔣仲舒云方伯詩亦清新要非作手

詩話方伯務謝朝華力啓夕秀取材結體頗與段柯古相似

題山水小景

野外少人躅值此佳日遲偶與二三友游觀賦新詩  
青松藹繁蔭碧草含華滋逍遙恣言笑童穉亦  
娛嬉濟濟炫春服悠悠詠清沂茲歡恐難再興盡以  
為期

湖山佳趣卷

宦游愜深好乃在名勝區山水自足適況茲職文儒橫  
經有餘閒逍遙出通衢春服各已成遂與童冠俱徘徊

恣言笑登陟忘飢飭晴鷺戾層空弱藻翻文魚至理與  
景會天機獨吾娛悠悠仰川上眷眷懷舞雩詠歌返鶯  
舍高興誰能踰

徐道士安處軒

塵氛既屏絕氣宇亦澄鮮心恬境逾寂慮遣情自捐結  
宇依層巖開軒俯重淵遙林含宿雨古樹帶秋烟落花  
晚成積歸鳥夕知還習靜泯衆累守默息萬緣清虛固  
其性聲利豈所便智黜道乃得朴返真斯全將隨鸞鳳

侶以引龜鶴年

經浯溪讀元結大唐中興頌

平生念浯溪  
鐫鏡有遺跡  
揚舫泝湘水  
登臨暫來即  
穹崖倚層雲  
竒險自天闢  
漫叟詞既嚴  
顏公筆無敵  
鬼神屢呵護  
風雨長洗滌  
滌忠槩儼尚存  
氷銜猶可識  
端容斂襟讀  
感慨重心戚  
誰畫靈武謀  
大物取何亟  
唏嗟中興業  
諒重君子惜  
遂巡解舟去  
回顧三歎息

蝻冢

七月月生魄，蝮出溱洧疆。始焉學躍跳，倏忽羽翅長。所  
過楮郊坳，矧復遺稻梁。坐令飮飽腹，立化饑餒腸。督民  
殄斯類，晨夕紛遑遑。隳突羨龍泓，炬火明山岡。燎焚弱  
質儘，撲擊微骸僵。卒夫載朽骨，絡繹持宮筐。穿穴掩腥  
穢，作冢官道傍。罪浮彼破鏡，死安能償。蝮蛇實搖處，  
已疾傳醫方。蜜蜂誠小物，亦解奉其王。畜蠶必吐縷，世  
賴充衣裳。畏蚊恐嚙體，幃幕席與牀。青蠅奚足憎，赤蠱  
應可防。編竹蟻知報，勤誦螢聚光。致雨蜥蜴驗，起痺全

竭良原性殊善惡稼穡咸無傷獨茲口吻酷黍稷爭先  
戕乾坤動物夥去爾庸何妨吾將告真宰投畀魑魅鄉  
昆蟲永無作歲歲歌豐穰

觀啓母石

夙負山水癖苦乏幽討緣幸茲崧與少秀色當眼前公  
餘陟峻岡忽覩石一卷特立四無隣觚稜不相聯云是  
啓母身化在郊墟嗚呼之乃擘裂啓出仍完全幻語本  
荒唐昉見淮南篇遐想覆載間滄桑屢更遷安知運代



移墜彼千仞巖厥理誠可推賢達固釋然矢詩正妖譎  
昧者庶或悛後世有豪傑為我焚其篇

端午日游少林寺

少林聳峒堯有路達蔥嶺半生懷勝槩老乃踐真境縑  
流遠見迺偏袒仍露頂升高縱遐觀頗覺癡緣屏蒲風  
翻卷帙艾色侵衣領掇蔬僧具供飲騎童汲井自拈清  
淨香作禮爇古鼎超超昔神師順寂同溟滓而於片石  
上留此不滅影竺夏雖異轍皆貴能猛省寒巖許分坐

禪定畢餘景

送楊郎中催馬草還京

大梁據中土自昔風氣旺北邙殊蜿蜒太室極雄壯黃  
河貫其間浩浩恣奔放四野開平行桑柘綠相鄉丁男  
事耕耨姑婦治絲纊菽麥盈倉庾醕醴溢盆盎近歲頗  
凶屯旱暵歛農望念茲饑餒餘十室九鰥曠長貧負租  
稅遠役困夫匠督芻實賴公區畫咸適當深體堯舜心  
推仁憫彫喪叱咤尚弗忍矧肯施鞭杖愧余謏劣才句

宣乏善狀竭力奉寬條庶減疲癘恙贈別陳時艱冀君  
徹卿相

擬古

吾觀日與月乃是陰陽精彼升此攸降循環有常經萬  
方仰臨照元良則其明離纏遂晦蝕惟辟修德刑玄象  
雖緬邈人當思戒懲

夏末偶尋洞惠道院

曉起涼月淡絺衣坐肩輿灑然塵慮豁遂即道者廬蕭

條殿廊存亭軒化荒墟山門憩樵農蘚砌鹿豕趨雷傾  
有墮瓦樹伐無遺株仙家尚消沉沉乃俗士居蓬萊屢  
清淺此事諒弗虛吾聞至人言一氣運化樞莫窺機織  
微孰外定數拘通由饑亡命載以賄喪軀榮華豈久在  
役智慧羣愚

丙寅初度作

余生如稗松由寸望百尺既承雨露滋亦受霜雪積蹉  
跎踰七十勤苦曾備歷誤蒙明聖知謬忝中外職顧已

慚菲薄於時乏裨益處盈虧必隨履泰否斯即至理諒  
在茲昧者固弗識叩閭乞殘骸休退恩旨錫遂令犬馬  
軀獲返田野跡長揖畫省僚重負從此釋今辰屆初度  
厨傳仍岑寂傍人競嗤笑窮約猶曩昔妻孥頗愧赧而  
我固悅懌平生守儒素晚節敢變易回思永樂初歲月  
類梭擲同年四百餘多已在鬼域存者纔十輩猶被利  
名役迂踈獨何幸林下得偃息遺榮遂安閒養靜忘跛  
蹙游鱗泳清波羈鳥斂倦翼貧非吾所憂病豈吾所戚

過吳門次薩天錫韻

七澤三江通甫里楊柳芙蓉照湖水閭門過去是盤門  
半掩珠簾畫樓裏蘼蕪生遍鴛鴦沙東風落盡棠梨花  
館娃香徑走麋鹿清夜鬼燈明絳紗三高祠下東流續  
真孃墓上風吹竹西施去後屨廊傾歲歲春深燒痕綠

高道士所畫山水

伊誰丹青擅能事畫出羣山與山似樹杪如聞雪瀑泉  
林間疑有雲門寺杖藜橋上知何人抱琴可望不可親

高師指點笑相語我昨圖成殊逼真

題周參政所藏山水小景

天壤有異境描摹付良工佳山與秀水幻置軒窗中村  
村陌陌皆勝處花竹園林饒雅趣過鳥疑飛却不飛行  
人欲去何曾去松坡竹塢疊更重雪瀑倒濕青芙蓉岡  
巖島洞盡在眼樵牧耕釣俱可容九曲溪流漾清泚荒  
渡斜陽見舟尾石上吟翁鎮日留欄前眺客今年倚我  
觀風物似杭州樹木雲霞分外幽豈必西湖有奇勝展

圖高興亦悠悠

題秋塘鵝鵒圖

秋風浙瀝秋塘淨菰米沉波荷折柄翻藻魚跳水氣腥  
采菱人散歌聲定蓮莖嫋嫋綴枯房上有雍渠立晚涼  
翠蓋裂殘渾改色紅衣落盡尚餘香圖中頗得周詩義  
未論工拙先觀意不寫和鳴寫急難人間誰獨無兄弟  
嗟我龍鍾命弗齊今年同氣委黃泥白頭徒重鵞原感  
展卷他鄉忍淚題



留魯山縣

黎庶凋殘甚，惟餘朴儉風。  
名因元子重，地本魯王封。  
撫卹無賢令，流移有惰農。  
誰將于蒺藜曲，歌向五雲中。

新野即景

村暗濛濛雨，流渾淺淺溪。  
菊花長帶濕，豆莢半沾泥。  
野迥居民少，林昏去路迷。  
自投新野界，蒿草與人齊。

周原幽居

山色蛾眉秀，江流燕尾分。  
亂蟬吟落日，獨鶴引歸雲。  
黃

葉溪邊樹青帘雨外村興來留客坐隨意倒芳尊

早發小孤山遇風

湖盡江逾闊舟窮路若迷垂楊春寂寂芳草雨淒淒  
水竈鼉窟平沙鴈鷺堤風波隨地有何處可幽棲

送陳生歸吉水赤岸

清砧兼落葉總是別離情去路千程遠歸舟一葉輕  
秋雲連樹暗寒日映川明亦有滄浪興何時共濯纓

送周秀才遊長沙

迢遞長沙道蕭條晏歲遊  
亂山黃葉寺孤櫂白蘋洲  
夕鳥衝船過寒波背郭流  
毋論卑濕地賈傅昔曾留

送戴教授北行

別路三春雨行舟五兩風  
花香隨路減柳色上衣濃  
共是青雲客先成白髮翁  
離情如逝水萬折亦朝東

新安謠

三首

新安野老髮垂肩說著先朝淚  
泣然洪武初年真少事  
幾曾輕到縣衙前

垂老頻逢歲薄收秋租多欠賣耕牛縣官不暇憐饑餒  
喚拽官車上陝州

當夫當匠子孫亡田地荒蕪戶有糧昨日迤西蕃使過  
盡驅婦女趕牛羊

宜陽道中

綠陰重疊鳥間闐野棗花香宿雨殘天遣浮雲都捲盡  
教人一路看青山

高縣遇端午

老大偏多故里心  
一逢佳節一沾襟  
誰知此日菖蒲酒  
又在山城獨自斟

胡謚一首

謚字廷慎鄆縣人永樂甲申進士歷官山東參政

秋思

遠客尋常歎索居  
秋來懷抱意何如  
高城月白砧聲急  
古戍霜清木葉疎  
塞馬正肥秋苜蓿  
江蓴空憶舊鱸魚

故人迢遞天南北不寄相思尺素書

嚴貞一首

貞字頤正嘉興人永樂甲申進士知景陵縣

詩話頤正詩僅存柳州城樓一首新音彙編謂官至雲南右布政使改雲南舊志布政使題名記有嚴貞係寧波奉化人乃永樂戊戌進士別是一人也

和柳子厚登柳州城樓

獨上層樓望海天異鄉愁思正茫然溪雲暝帶桺榔雨  
野日晴銷薜荔烟百粵湖山通絕徼半江菰米熟秋田

舊游別後多零落日斷滄波祇自憐

明詩綜卷二十